

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
18.10 मंगलवार दिनांक 24.02.2026

प्रमुख समाचार –

- वित्तमंत्री ओपी चौधरी आज राज्य विधानसभा म बछर दू हजार छब्बीस–सत्ताईस बर पेस करीन बजट–ए बजट एक लाख बहत्तर हजार करोड़ रुपिया के हवय ।
- ए बखत बजट के थीम “संकल्प” हवय–बारह नवा योजना अउ पांच नवा मिशन सुरु करे के करे गेहे प्रावधन ।
- कबीरधाम पुलिस ह करीबन पांच करोड़ रुपिया के नौ क्विंटल गांजा बरामद करे हे ।

विधानसभा बजट–01

वित्तमंत्री ओपी चौधरी ह आज राज्य विधानसभा म बछर दू हजार छब्बीस–सत्ताईस बर बजट पेस करीन । ए बजट करीबन एक लाख बहत्तर हजार करोड़ रुपिया के हवय ।

अपन बजट भाषण म वित्तमंत्री ह कहिन कि ए बखत बजट के थीम “संकल्प” हवय । संकल्प ले आसय हवय – समावेशी विकास, अधोसंरचना, निवेस, कुशल मानव संसाधन, अंत्योदय, लाईवलीहुड अउ पॉलिसी ले परिणाम तक । बजट म पांच मिशन सुरु करे के घलो घोषणा करे गेहे । एमा मुख्यमंत्री एआई मिशन, पर्यटन विकास मिशन, खेल उत्कर्ष मिशन, अधोसंरचना मिशन अउ स्टार्टअप के संग निपुण मिशन सामिल हे । ए जम्मां मिशन मन बर अवइया पांच बछर के दउरान हर बछर कम ले कम सौ–सौ करोड़ रुपिया के रासि के प्रावधान करे जाही ।

बजट म बारह नवा योजना सुरु करे के घलो घोषणा करे गेहे । मुख्यमंत्री आदर्श शहर–समृद्धि योजना के तहत नगर पालिका अउ नगर पंचायत मन म बुनियादी अधोसंरचना के संग नागरिक सेवा मनके विस्तार करे जाही । मुख्यमंत्री द्रुतगामी सड़क संपर्क योजना के तहत राज्य म तेज गति वाले दू ले चार लेन वाले सड़क बनाय जाही ।

एखर संगेसंग शिक्षा के गुणवत्ता बढ़ाय बर स्वामी विवेकानंद उत्कृष्ट साला योजना सुरु करे जाही। राज्य के सरकारी कर्मचारी मन ल कैशलेस चिकित्सा सुविधा देवाय बर योजना सुरु करे जाही। एखर बर बजट म सौ करोड़ रुपिया के प्रावधान करे गेहे। प्रतियोगी परीक्षा के तैयारी करइया युवा मन ल आर्थिक मदद दे बर घलो सीजीएस नाम ले योजना सुरु करे जाही। एखर संगेसंग बिलासपुर, जगदलपुर अउ अंबिकापुर ले हवाई सेवा मन ल बढ़ावा दे बर सीजी वायु योजना सुरु करे जाही।

विधानसभा बजट-02

वित्तमंत्री ह बतईन कि राज्य सरकार रानी दुर्गावती योजना सुरु करही। एखर तहत परिवार म नोनी मनके जन्म होय म ओ बालिका के आयु अट्ठारह बछर पूरा होय के बाद डेढ़ लाख रुपिया दे जाही। एखर संग आर्थिक रूप ले कमजोर मेधावी छात्र-छात्रा मन ल पढ़ाई बर किराया म आवासीय सुविधा बर आर्थिक मदद देवाय के उद्देश्य ले मुख्यमंत्री शिक्षा सहयोग योजना सुरु करे जाही।

प्रदेस के लखपति दीदी मन ल देस के सफल महिला उद्यमी मनके कामकाज ले अवगत कराय बर लखपति दीदी भ्रमण योजना सुरु होही। उहें, लोगन मन ल राज्य के पांच सक्तिपीठ – दंतेवाड़ा, डोंगरगढ़, रतनपुर, चंद्रपुर अउ कुदरगढ़ के आस्था केन्द्र मनके दर्सन बर सक्तिपीठ भ्रमण योजना सुरु करे के घोसना करे गेहे। एखर संग सरकारी स्कूल के प्रतिभासाली विद्यार्थी मन ल छत्तीसगढ़ के प्रमुख ऐतिहासिक अउ सांस्कृतिक केन्द्र मनके भ्रमण कराय बर छत्तीसगढ़ युवा दर्सन योजना सुरु करे जाही। संगेसंग केन्द्र सरकार डहार ले मनरेगा के जघा म सुरु करे गे विकसित भारत जी-राम-जी योजना बर बजट म चार हजार करोड़ रुपिया के प्रावधान करे गेहे।

वित्तमंत्री ह अपन बजट भासन म बतईन कि छत्तीसगढ़ म समावेशी विकास बर सरकार ह कतकोन नवा पहल सुरु करे फइसला लेहे। एखर तहत अबूझमाड़ अउ जगरगुंडा म एजुकेसन सिटी स्थापित करे जाही। राज्य म तेईस नवा औद्योगिक पार्क स्थापित करे जाही। जनसमस्या के निराकरण बर मुख्यमंत्री हेल्प लाइन पोर्टल सुरु करे जाही। राज्य म साइबर तहसील बनाय जाही। उहें, छत्तीसगढ़ म बने हस्तशिल्प उत्पाद मन ल बढ़ावा दे बर देस के पांच प्रमुख हवाई अड्डा म हैंडीक्राफ्ट शो रूम बनाय जाही।

विधानसभा बजट-03

एखर संगेसंग जनजातीय लोक संगीत अउ सांस्कृतिक विरासत के संरक्षण बर जनजातीय “सुरगुड़ी स्टुडियो” स्थापित करे जाही।

वित्तमंत्री ह अपन बजट भासन म बतईन कि राजधानी रायपुर म प्रदेश के पहिली होम्योपैथी कॉलेज खोले जाही। उहें, रायपुरेच म एडवांस कार्डियेक इंस्टीट्यूट घलो बनाय जाही। इंद्रावती नदी म मटनार अउ देउरगांव म बैराज अउ नहर के निर्माण करे जाही। एखर ले बस्तर के करीबन बत्तीस हजार हेक्टेयर क्षेत्र म सिंचाई सुविधा के विस्तार होही। बस्तर म बस्तर फाइटर्स बल बर पन्द्रह सौ नवा पद मन म भर्ती करे जाही। एखर संगेसंग बस्तर म खेल अकादमी सुरू करे जाही।

वित्तमंत्री ह अपन बजट भासन म कहिन कि राजधानी रायपुर ह प्रदेश के सबले बड़े परीक्षा केन्द्र आय। इहां सरलग प्रतियोगी परीक्षा होवत रहित्थे, जेमा छत्तीसगढ़ के संगेसंग पड़ोसी राज्य ले घलो उम्मीदवार आथे, एला ध्यान म राखत रायपुर म एक मेगा परीक्षा केन्द्र स्थापित करे जाही। एखर ले राज्य म प्रतियोगी परीक्षा करवाय म आसानी होही। एखर संगेसंग रायपुर, बिलासपुर अउ दुर्ग म तीन नवा छत्तीसगढ़ इंस्टीट्यूट ऑफ टेक्नोलॉजी स्थापित करे जाही।

वित्तमंत्री ह बतईन हे कि सुधार के श्रृंखला म आगू बाढ़त सरकार ह छत्तीसगढ़ स्टेट फाइनेंसियल सर्विस लिमिटेड के स्थापना करे के फइसला लेहे। एखर संग प्रदेश म सेंट्रल ट्रेजरी के स्थापना करे जाही। वित्तमंत्री ह बतईन कि छत्तीसगढ़ सरकार उहार ले करे गो रिफॉर्म्स के एवज म केन्द्र सरकार ह पाछु दू बछर म करीबन तेरह हजार करोड़ रुपिया के रासि राज्य सरकार ल देहे।

विधानसभा बजट—04

वित्तमंत्री ह बतईन हे कि सरकार ह सरकारी कर्मचारी मन बर जिला अउ विकासखंड स्तर म क्वार्टर्स बनाय के फइसला लेहे। ए बछर ग्यारह जिला मुख्यालय अउ पच्चीस विकासखंड मुख्यालय मन म क्वार्टर बनाय जाही। वित्तमंत्री ह अपन बजट भासन म एक ठिन बिसेस घोसना करत बतईन कि माईलोगिन मनके आर्थिक अउ सामाजिक सशाक्तिकरण बर बजट म प्रस्ताव करे गेहे कि अवइया बछर ले माईलोगिन मनके नाम ले अंचल संपत्ति खरीदे म भारित पंजीयन सुल्क म पचास प्रतिसत के छूट दे जाही।

बजट प्रतिक्रिया

विधानसभा म आज पेस करे गे बजट उपर प्रतिक्रिया देवत मुख्यमंत्री विष्णुदेव साय ह कहिन हे कि ए बजट समावेशी विकास, सुशासन अउ जनकल्याण के संकल्प ल आगू बढ़ाने वाला साबित होही। ओमन कहिन कि ए बजट विकसित अउ समृद्ध छत्तीसगढ़ के निर्माण बर सरकार के विज़न ल नवा मजबूती दीही। श्री साय ह कहिन कि राज्य के बुनियादी ढांचा, रोजगार सृजन, कृषि उन्नयन, सामाजिक सुरक्षा अउ मानव संसाधन विकास ल नवा दिसा दे म ए बजट प्रमुख भूमिका निभाही।

दूसर कोति, नेता प्रतिपक्ष डॉक्टर चरणदास महंत ह कहिन कि बजट म प्रदेश के युवा अउ माईलोगिन मन बर कुछु नइ हे।

माओवादी आत्मसमर्पण

माओवादी मनके एक शीर्ष नेता देवजी समेत चार झिन माओवादी मन ह आज तेलंगाना पुलिस के आगू आत्मसमर्पण कर देहे। छत्तीसगढ़ के उपमुख्यमंत्री अउ गृह मंत्री विजय शर्मा ह कहिन हे कि माओवादी मनके शीर्ष अगुवई आज सिरा हगे हे। ए ह एक टिन बड़का उपलब्धि हरय।

गांजा—बरामद

कबीरधाम पुलिस ह करीबन पांच करोड़ रुपिया कीमत के नौ क्विंटल गांजा बरामद करे हे। ए मामला म पुलिस ह राजस्थान के एक झिन आरोपी ल गिरफ्तार करे हे।

मिले खबर के मुताबिक गांजा ल एक कंटेनर म भरके ओडिसा ले राजस्थान ले जावत रिहीस। इही दउरान चिल्फी पुलिस ह नागालैंड पासिंग तीर कंटेनर ल रोकीस। जांच के दउरान कंटेनर म तीस—तीस किलो के तीस बोरी ले नौ सौ किलो गांजा जब्त करीस। आरोपी कंटेनर म गुप्त चैंबर बनाके गांजा के तस्करी करत रिहीन। पुलिस ह कंटेनर ल घलो जब्त कर लेहे।

संक्षिप्त समाचार

- सारंगढ-बिलाईगढ जिला म ँकेच परिवार के तीन झिन लोगन के हत्या के मामला आगू आय हे। धारदार हथियार ले करे गे हमला म दू झिन सदस्य मन गंभीर रूप ले घायल हगे हे।
- भिलाई के प्रथम वाहिनी छत्तीसगढ सशस्त्र बल म काली ले चौदहवां अखिल भारतीय पुलिस तीरंदाजी प्रतियोगिता सुरु हगे हे। प्रतियोगिता के सुभारंभ उपमुख्यमंत्री विजय शर्मा ह करीन।
